




پیرگلی: ہک صحت افزاء مقام

جموں و کشمیر اپنے قد رتی حُسن نی وجہ نال دُنیا پھر بچ مشہور ہے۔ خاص کر وادی کشمیر نی تہ کوئی مثالِ ملنی مُشکل ہے۔ مغل بادشاہ جہانگیر نے آکھیا سی اگر کوئی دُنیا اُپر جنت ہے تو اوہ کشمیر ہے۔ جموں تہ کشمیر کی ہک ہائی وے روڈ ملار پٹی ہے۔ لیکن پونچھ راجوری والے لوکاں واسطے ایہہ رستہ قدرِ دور سا۔ پونچھ راجوری کی وادی کشمیر نال ملان والی روڈ ناناں مغل روڈ ہے اسے روڈ نے درمیان بچ ایک بلند ترین مقام ہے جس کی پیرگلی آکھیا جانا ہے۔

اس نی وجہ تسمیہ ایہہ دہسی جانی ہے کہ بہت عرصہ پہلاں اس مقام ورا یک روحانی بزرگ حضرت شیخ احمد کریم بیٹھے سن۔ ایک عرصہ تھیں ایہہ دستور آرہیا ہے کہ اس جگہ مسافراں کی نمکین چاء ضرور ملنی ہے۔ اس جگہ نے گردِ نواح بچ ڈھوکاں

ہین جتھے مال مویشی سیکڑیاں نی تعداد بچ پل رہے ہین۔ ایہہ مال مویشی اتھے صرف برہیانے موسم بچ ہی چر سکے ہین کیاں جے سیالے بچ اے علاقہ برف نی سفید چادر نے تھلے ہونا ہے ہور ٹھنڈا پنے کمال اُپر ہونی ہے۔

لیکن برہیانے موسم بچ پیرگلی نی فضا تگن نے قابل ہونی ہے۔ پونچھ راجوری تہ کشمیر تھیں بہت سیاح اس مقام اُپر اکھٹے ہونے ہین۔ بزرگ قدرتی حُسن تھوں لُطف اندوز ہونے بچے کھیڈ نے ہور نو جوان وی گپ شپ لائین۔ گویا ہر طرف ایک چہل پہل ہونی ہے۔

پیرنی گلی اوہ مقام ہے جتھے پونچھ راجوری ہور کشمیر والیاں کی اک دُوے نا کلچر، تہذیب تہ فکر سمجھن نا موقع ملنا ہے۔ اس اُچے تہ سوہنے مقام اُپر بیٹھ کے دوہاں طرفاں نے لوک تبادلہ خیال نے نال نال اپنے تجارت تہ کاروبار کی باہدا دین ناوی موقع ملنا ہے۔

پیرگلی بچ کھڑے ہو کے جیہڑا حصہ کشمیر نی طرف ہے اک نظر مارو دور دور تکر نیلے تلے بچ ہر قسم نے جانور چرنے نظر آنے ہین۔ جانوراں نی موج مستی ہور محبت تگنے لائق ہونی ہے۔ اس علاقے بچ بڑی تعداد بچ پائے جانے والے جنگلی جانوراں بچ ہے شیر سینہہ، چھ مارخور، جنگلی بکری، جنگلی گاں وغیرہ شامل ہین۔

پیرنی گلی نے آساں پاساں بچ بھوں چنگیاں تہ سوہنیاں ٹھوکاں موجود
ہین۔ جتھے لوکاں برہیا واسطے اپنی گنجائش نے مطابق ٹھہارے وی بنائے ہین۔
انہاں ٹھوکاں بچ رنگ برنگے پھل ہک دل کش منظر پیش کرنین۔ جو شخص وی
اک بار پیرنی گلی گیا اس بار بار ایہہ خواہش کیتی کہ اوہ بار بار پیرنی گلی جاوے۔
تمام نشیبی علاقے نے لوک گرمی تھوں تنگ آئی پیر گلی نی ٹھنڈی تہ تازہ ہوا
خاطر ہر برہیا اتھے ضرور اچھنن۔ پیر گلی مغل روڈ اُپر سب تھوں اُچی جگہ ہے
جیہڑی سطح سمندر تھیں 11,500 فٹ اُچی ہے۔ اس بچ کوئی شک نہیہ کہ پیر گلی
ہک صحت افزا مقام ہے۔

1۔ اوہکھے لفظاں نامطلب:

بلند ترین	:	سب توں اُچی
مارخور	:	اک جانور ناناں (بکرے نی طراں ہونا)
مسافر	:	سفر کرنے والا
چہل پہل	:	رونق
نشیبی	:	مندھرا علاقہ۔ اوہ زمین پہاڑاں ناپانی لگی جانا
لطف	:	مزرہ

2۔ مندرجہ ذیل سوالاں نے جواب دیو:

- (۱) پیرنی گلی کس مقام اُپر ہے؟
- (۲) اس جگہ کی پیر گلی کیوں آکھیا جانا ہے؟
- (۳) سردی نے موسم بچ لوک پیر گلی کیاں نیہہ جانے؟
- (۴) اتھے لوک مال مویشی کیاں آنے ہین۔

3۔ خالی جگہاں کی پھرو:

- (۱) مُغل روڈ بچ ہک گلی ہے جس ناناں..... گلی ہے۔
- (۲) پیر گلی نہایت ہی..... تھاں ہے۔
- (۳) سردی نے موسم بچ اتھے..... ہونی ہے۔
- (۴) لوگ پیر گلی..... واسطے اچھنن۔
- (۵) جس روحانی شخص نے ناں اُپر پیر گلی مشہور ہے اُنہاں نا اصلی ناں..... ہے۔

